

Edizioni

- letto 534 volte

Huet

I.

Douce dame, grez et graces vous rent,
Quant il vos plaist que je soie envoisiez;
Atendu ai vostre comandement,
Si chanterai por vos joianz et liez,
Et, s'il vos plaist, de moi merci aiez.
En tel guise vos en praigne pitiez
Qu'il ne vos poist se j'aim si hautement.

II.

Je sai de voir que resons me defent
Si haute amor se vos ne l'otroiez;
Maiz haut et bas sont d'un contenment,
Qu'amor les a a son talent jugiez;
Siens est li bas qui por li s'est hauciez,
Et siens li hauz qui s'en est abaissiez;
Qu'a son voloir les monte et les descent.

III.

Je ne di pas que nus aint bassement,
Puis que d'amor est surpris et liiez,
Honoré doit la joie qu'il atent,
S'il estoit rois, et ele iert a ses piez.
Maiz je sui, las, sor toz autres puiez,
De hautement amer a mort jugiez;
Mes mout muert bel qui fait tel hardement.

IV.

Par Dieu, dame, l'amors de vos m'esprent,
Qui m'occira, se vos ne m'en aidiez.
El ne fait mes qu'a son comandement,
Si li ert bel se por li m'ociez.
Et s'endroit vous est vaincue pitiez,
Moie ert la perte, et vestres li pechiez,
Que dou partir de vous n'i a nient.

V.

Fine biauté plesant et cors tres gent
Vos dona Dieus, dont il soit merciez.
Nus ne porroit loer si finement
Voz granz valors con vos les mostrieriez,
En touz bienfèz et en toz biens proisiez;
Et s'il vous plaist honorez n'essaussiez
N'iert ja a droit qui d'amor ne l'atent.

VI.

Chantez, Renaut, qui antan amïez;
Or m'est avis que vos en retraiez.
Se du partir estes appareilliez,
Ja onques Deus oan ne vos ament.

VII.

Par Dieu, Gilet, faus amanz desloiez,
Qui d'amor s'est partiz et esloigniez,
Vaut assez plus qu'uns autres enragiez;
Chastoeiez en vos et l'autre dolent.

- letto 376 volte

Petersen Dyggve

I.

Douce dame, grez et grasses vous rent,
quant il vous plaist que je soie envoisiez;
atendu ai vostre conmandement,
si chanterai pour vous joianz et liez,
et, s'il vous plaist, de moi merci aiez.
En tel guise vous en prende pitiez
qu'il ne vous poist, se j'aim si hautement.

II.

Je sai de voir que Raisons me desfent
si haute amour, se vous ne l'otroiez;
maiz haut et bas sunt d'un contenment,
puiz que les a a son talent jugiez;
suenz est li bas qui pour li s'est hauciez,
et suens li haus qui s'en est abaissiez;
a son voloir les monte et les descent.

III.

Je ne di pas que nus aint bassement,
puiz que d'amours est soupris et liiez,
hounorer doit sa joie qu'il atent,

se il iert rois, et ele iert a ses piez.
Maiz je sui, las, seur touz autres puiez,
de hautement amer a mort jugiez;
maiz molt muert bel qui fait tel hardement.

IV.

Par Dieu, dame, l'amours de vous m'esprent,
qui m'ocirra, se vous ne m'en aidiez.
ele ne fait qu'a son conmandement,
si li iert bel se pour li m'ociiez.
Et s'endroit vous est veincue pitiez,
moie iert la perte, et vostres li pechiez,
que dou partir de vous n'i a neient.

V.

Fine biauté plaisant et cors tres gent
vous dona Diex, dont il soit merciiez.
Nus ne porroit loer si finement
vos granz valors come vous moustriiez
en tous bons faiz et en touz biens prisiez;
et s'il vous plaist, honorez n'essaussiez
n'iert ja a droit qui d'Amours ne l'atent.

VI.

Chantez, Renaut, qui antan amiiez;
or m'est avis que vous en retraiez.
Se du partir estes appareilliez,
ja onques Dieux puiz jour ne vous ament.

VII.

Par Deu, Gilet, faux amanz desloiez,
qui d'amors s'est partiz et esloigniez,
vaut assez pis c'uns autres enragiez;
chastoiez en vous et l'autre dolant.

- letto 329 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-275>